

AMPLISSIMO SENATORVM ORDINI CIVITATIS NORICAE DOMINIS PRUDENTISSIMIS, Ioannes Schonerus Caroloftadius,  
S. P. D.



ASTROLOGIAM olim, P. C. non nisi apud summos Reges in precio fuisse, nemo qui temporum legerit historias, ignorat. Sublimior enim ea cognitio habita est semper, quæ ut uulgi humilitas ad eam ascendere posset unquam. Nam nascendi, moriendiq; causam ex motu prouenire cæli, tanquam occasum ab ortu, aut finem ab initio, à non nisi summis ingenijs percipitur satis. Quinetiam uniuersa illa rerum natura, quid aliud est, quam ordinata quædam, sibiq; semper constans immutatio, atq; conuersio? Quid illa rerum cum generatio, ut uocant, tum corruptio: quid deniq; uita & mors est animantium, quam quidam ab initio ad finem usq; motus? Præterea quid motus ille cæli, tum stellarum aliarum radiationes mortalium generi præstent, ex ipsius Solis & Lunæ motibus existimare licebit, Sol enim non semper easdem & simul æquales in corporibus nostris excitat qualitates, sed pro ea regione cæli quam peragrat, dum est aut propinquior aut remotior à conspectu nostro, agere manifestissime comprobatur. Quare cum hæc ita esse intelligerem, operæ precium me facturum existimaui, si motus cum errantium, tum fixarum stellarum, earundemq; longitudines, & latitudines: itemq; coniunctiones, oppositiones & aspectus luminarium & planetarum adinuicem: Deniq; etiam rationem æquationum duodecim domorum cæli, iuxta modum omnino rationabilem, quo usus est iam ante nos uir calculis doctorum omnium incomparabilis Ioannes de Monte regio, in lucem egerem: quæ nunc omnia cura & diligentia mea non solum emendatiora, sed & iuxta laboris mei accessione locupletiora, auctoriaq; habere possunt scholæ. Etenim hunc laborem meum & scholis nostris prodesse ratus sum plurimum, dum eo ingenia iuuentutis præclara, ad præclarissimum (ut ita dicam) deorum munus pertinaci studio persequendum, inuitarem, & eos qui alioqui sua sponte Mathematicas disciplinas amore complectuntur, mihi redderem coniunctiores.

Iam uero cum sciam neminem melius mereri de humano genere, atque eos qui recta studia promouere, ipseq; mihi hanc prouinciam iam pridem subeundam censuissem, tamen ultro currenti calcar addere Epistolis suis uoluerunt, uiri in omni rerum honestarum scientia excellentissimi, Philippus Melanchthon, & Iacobus Milichius: quorum illi ob incredibilem eruditionem

nem